



საქართველოს მთავრობის გ ა ნ კ ა რ გ უ ლ ე ბ ა

N1429 2023 წლის 7 აგვისტო ქ. თბილისი

**„2023 წლის რთვლის ორგანიზებულად ჩატარებისათვის
განსახორციელებელი ღონისძიებების შესახებ“ საქართველოს მთავრობის
2023 წლის 19 ივნისის №1156 განკარგულებაში ცვლილების შეტანის
თაობაზე**

საქართველოს ზოგადი ადმინისტრაციული კოდექსის 63-ე მუხლის შესაბამისად, „2023 წლის რთვლის ორგანიზებულად ჩატარებისათვის განსახორციელებელი ღონისძიებების შესახებ“ საქართველოს მთავრობის 2023 წლის 19 ივნისის №1156 განკარგულებაში შეტანილ იქნეს ცვლილება და განკარგულებას დაემატოს შემდეგი შინაარსის მე-7 – მე-18 პუნქტები:

„7. „საქართველოს 2023 წლის სახელმწიფო ბიუჯეტის შესახებ“ საქართველოს კანონით გათვალისწინებული მევენახეობა-მეღვინეობის განვითარების პროგრამის (პროგრამული კოდი: 31 03) „რთვლის ხელშეწყობის ღონისძიებების“ ქვეპროგრამით (პროგრამული კოდი – 31 03 05) გამოყოფილ ასიგნებათა ფარგლებში, სააგენტომ მევენახეობის სფეროში დასაქმებული ფიზიკური პირების მიერ მიღებული ყურძნის მოსავლის

რეალიზაციის ხელშეწყობის მიზნით, უზრუნველყოს ყურძნის ჩამზარებელი ფიზიკური პირებისგან (შემდგომში – ყურძნის ჩამზარებელი) კახეთის რეგიონში მოწეული 1 კგ ყურძნის შესყიდვის სანაცვლოდ ღვინის კომპანიებზე სუბსიდიის გაცემა შემდეგი ოდენობით:

ა) 1 კგ რქაწითლისათვის – 0,20 ლარი;

ბ) 1 კგ კახური მწვანისათვის – 0,20 ლარი.

8. საქართველოში მოწეული ყურძნის ჩაბარება/მიღება რთვლის მიმდინარეობისას განხორციელდეს მევენახეობის შესაბამის ზონაში სააგენტოს მიერ გაცემული მევენახეობის კადასტრის ამონაწერის საფუძველზე.

9. ეთხოვოთ ახმეტის, გურჯაანის, ყვარლის, დედოფლისწყაროს, თელავის, ლაგოდეხის, საგარეჯოს, სიღნაღის, ამბროლაურისა და ცაგერის მუნიციპალიტეტებს, საჭიროების შემთხვევაში, უზრუნველყონ სააგენტოს მიერ შემუშავებული ფორმის შესაბამისად ყურძნის ჩამზარებლებზე ყურძნის წარმოშობის შესახებ ცნობების გაცემა.

10. რთვლის მიმდინარეობისას ყურძნის ჩაბარების/მიღების პროცესის ორგანიზებულად წარმართვის მიზნით:

ა) კახეთის რეგიონში მოწეული რქაწითლისა და კახური მწვანის ჩაბარება/მიღება შპს „მოსავლის მართვის კომპანიაში“ (ს/ნ: 405406109) განხორციელდეს შესაბამისი მუნიციპალიტეტის მიერ ყურძნის ჩამზარებლებზე გაცემული ყურძნის წარმოშობის შესახებ ცნობის შესაბამისად;

ბ) კახეთის რეგიონში მოწეული ყურძნის ჩაბარება/მიღება ღვინის კომპანიების მიერ განხორციელდეს ჩამზარებლებთან შეთანხმებული ინფორმაციის (ყურძნის ჩამზარებელი, ჩასაბარებელი ყურძნის ჯიში და რაოდენობა, ყურძნის ჩაბარების ადგილი და დრო) პორტალზე – portal.wine.gov.ge განთავსების შემდგომ.

11. ამ განკარგულების მე-7 პუნქტში მითითებული სუბსიდიის მიღების უფლება აქვს მხოლოდ იმ ღვინის კომპანიას, რომელსაც დაცული

აქვს ამ განკარგულების მე-4 პუნქტით გათვალისწინებული პირობები და რომელიც:

ა) ყურძნის მიღება-გადამუშავების პროცესის დაწყებამდე სააგენტოსთან გააფორმებს ხელშეკრულებას (შემდგომში – ხელშეკრულება);

ბ) 2023 წლის რთვლის განმავლობაში შეისყიდის და გადაამუშავებს კახეთის რეგიონში მოწეულ არანაკლებ 100 (ასი) ტონა რქაწითლის ან/და კახური მწვანის ჯიშის ყურძენს;

გ) შესყიდული 1 კგ რქაწითლის ან/და კახური მწვანის ჯიშის ყურძნის სანაცვლოდ ყურძნის ჩამზარებელს გადაუხდის არანაკლებ 0,90 ლარს;

დ) 2023 წლის 1 დეკემბრამდე სააგენტოს წარუდგენს:

დ.ა) ყურძნის ჩამზარების თაობაზე ყურძნის ჩამზარებელსა და ღვინის კომპანიას შორის გაფორმებულ მიღება-ჩამზარების აქტს, რომელსაც ხელს აწერენ საქართველოს გარემოს დაცვისა და სოფლის მეურნეობის სამინისტროს/სააგენტოს, ღვინის კომპანიის უფლებამოსილი წარმომადგენლები და ყურძნის ჩამზარებელი;

დ.ბ) ყურძნის ჩამზარებლისთვის/ჩამზარებლებისთვის რქაწითლის ან/და კახური მწვანის ჯიშის 1 კგ ყურძნის შესყიდვის სანაცვლოდ არანაკლებ 0,90 ლარის გადახდის დამადასტურებელ დოკუმენტაციას.

12. იმ შემთხვევაში, თუ ღვინის კომპანიას არ აქვს დასრულებული ყურძნის მიღების პროცესი და სააგენტოსათვის წარდგენილ განზრახვაში დაფიქსირებული აქვს არანაკლებ 100 (ასი) ტონა ყურძნის – რქაწითლის ან/და კახური მწვანის მიღების შესახებ ინფორმაცია, მას უფლება აქვს, მიიღოს სუბსიდიის თანხა, რისთვისაც ღვინის კომპანია ვალდებულია, 2023 წლის რთვლის მიმდინარეობის პროცესში წარადგინოს „საქართველოს ეროვნული ბანკის შესახებ“ საქართველოს ორგანული კანონის შესაბამისად კომერციული ბანკის მიერ სააგენტოს სასარგებლოდ გაცემული საბანკო გარანტია (ბენეფიციარი – სააგენტო), რომლის ოდენობაც 10%-ით უნდა აღემატებოდეს ღვინის კომპანიის მიერ მისაღები სუბსიდიის თანხას.

13. ღვინის კომპანიაზე ამ განკარგულების მე-7 პუნქტში მითითებული სუბსიდია გაიცემა ამ განკარგულების მე-11 – მე-12 პუნქტებით

გათვალისწინებული დოკუმენტაციის სააგენტოში წარდგენიდან 15 სამუშაო დღის ვადაში.

14. ღვინის კომპანიის მიერ ამ განკარგულებისა და ხელშეკრულებით გათვალისწინებული პირობების შეუსრულებლობის შემთხვევაში, ღვინის კომპანიის მიმართ მოთხოვნის უზრუნველყოფის მიზნით, სააგენტოს სასარგებლოდ გაცემული საბანკო გარანტიის თანხა სრულად მიემართება სახელმწიფო ბიუჯეტში.

15. ღვინის კომპანიების მიერ ყველა კატეგორიის ღვინის წარმოება დასაშვებია მხოლოდ რთვლის საკოორდინაციო შტაბის მიერ აღრიცხული ყურძნისაგან.

16. დაცული ადგილწარმოშობის დასახელების ღვინოების დასამზადებლად განკუთვნილი ყურძნის ჯიშის მოსავლიანობა 1 ჰა ვენახიდან განისაზღვროს ამ ღვინისათვის დადგენილი წარმოების სპეციფიკაციის მაჩვენებლის შესაბამისად.

17. ღვინის კომპანია ვალდებულია:

- ა) უზრუნველყოს ყურძნის ყოველდღიური მიღების განზრახვის შესახებ ინფორმაციის მიწოდება რთვლის საკოორდინაციო შტაბისათვის;
- ბ) მოახდინოს ყურძნის გადამუშავების შედეგად დარჩენილი ჭაჭის გამოხდა ან მისი სხვა სახით გამოყენება/განადგურება და არ დაუშვას ჭაჭის ფიზიკური პირებისთვის გადაცემა.

18. ეთხოვოთ თვითმმართველი ქალაქების აღმასრულებელ ორგანოებს 2023 წლის რთვლის პერიოდში ყურძნის რეალიზაციის ხელშეწყობის მიზნით შესაბამისი ადგილების გამოყოფა.“.

პრემიერ-მინისტრი



ირაკლი ღარიბაშვილი